

# OBRO DE BATISTO ARTOU

## AOU PRETÒRI DOOU JÙGI DE PAS

Recueil d'articles - parus dans un journal sous le titre  
Oou pretòri doou jùgi de pas  
de Batiste Artou et rassemblés dans un cahier par Bibal de l'Estaque.

Vers 1880

### LEI CINQ DET DOOU PEGOT

La semana passado, misè Burlo, la marchando d'uou de la carriero dei Vieiheis Escudello, ero estado counvidado per uno de seis amigo qu'es jardiniero aou Pradò, à assista aou trin de San-Ginié. Misè Burlo, per si leva un paou de sa boutigo, s'ero rendudo aou desi de soun amigo e avié mena em'ello sa bono, Nourado, uno joueino gavoueto decendudo doou Queiras per veni si plaça à Marsiho. Touto la jornada fougùe qu'un divertissamen per que, en despiè doou prouvèrbi, tant l'on si l'amuso aou trin de San-Ginié.

MISÈ BURLO. — Lou sero, anerian aou bal mountè n'en faguèri v-uno emè lou parraquié.

LOU JÙGI. — Tout acò provo que vous sias dounado de bouen temp, mai crèsi que sortès de la questien.

MISÈ BURLO. — Coumo vous fara plesi, moussu lou Jùgi.

LOU JÙGI. — Sias pa eicito per mi faire plesi, sias eici per dire soueidamen ce qu'avès à dire e ce que voulès doou tribunaou.

MISÉ BURLO. — Ce que vouèli li dire aou tribunaou es qu'aquel ome qu'es aqui, es un foutu pouar e ce que li demandi, es que li fague faire reparacien à n-aquello paouro pichouno.

LOU JÙGI. — Vous coumprèni pa ben.

MISÈ BURLO. — Ebè! vous vaou metre lei poueint su leis i. Quand fougùe miejo-nuè, diguèri à moun amigo: — Aro es temp de pàrti que deman de boueno ouro faou que duèrbi lou magasin e s'embarquerian emè Nourado dins un onibus. L'onibus ero plen como un uou e erian leis un su leis aoutre sarra como d'anchoio. A cousta de Nourado ero vengu s'asseta aquel ome que, ren qu'à seis uei, m'èri aperçudo qu'avié de marrideis entencien.....

LOU JÙGI. — Avès cresu agué à faire à n-un anarchisto, bessai?